

摘藻堂四庫全書薈要

史部

欽定四庫全書薈要

史部
通志卷一百十四

詳校官員外郎臣楊世綸



欽定四庫全書薈要卷九千二十六

史部

通志卷一百十四

宋右迪功郎鄭樵漁仲撰

東列傳第二十七

魏

張楊

張燕

公孫度

子康
子晃

康弟恭

晃弟淵

張繡

張魯

夏侯惇

韓浩
史渙

夏侯淵

子霸
稱

夏侯尚

子立
李

豐

許允
王經

荀彧

荀攸

賈詡

袁渙

張範

弟承

涼茂 國淵 王脩

張楊字稚叔雲中人也以武勇給并州為武猛從事靈
帝末天下亂置西園八校尉以所寵小黃門蹇碩為西
園上軍校尉軍京都欲以御四方徵天下豪桀以為偏
裨太祖及袁紹等皆為校尉屬之并州刺史丁原遣楊
將兵詣碩為假司馬靈帝崩碩為何進所殺楊復為進
所遣歸本州募兵得千餘人因留上黨擊山賊進敗董
卓作亂楊遂以所將攻上黨太守於壺關不下畧諸縣

衆至數千人山東兵起欲誅卓袁紹至河內楊與紹合復與匈奴單于於扶羅屯漳水單于欲叛紹楊不從單于執楊與俱去紹使將麴義追擊於鄴南破之單于與楊至黎陽攻破渡遼將軍耿祉軍衆復振卓以楊為建義將軍河內太守天子之在河東楊將兵至安邑拜安國將軍封晉陽侯楊欲迎天子還洛諸將不聽楊還野王建安元年楊奉董承韓暹挾天子還舊京糧乏楊以糧迎道路遂至洛陽謂諸將曰天子當與天下共之幸

有公卿大臣楊當捍外難何事京都遂還野王即拜大
司馬楊性仁和無威刑下人謀反發覺對之涕泣輒原
不問楊素與呂布善太祖之圍布楊欲救之不能乃出
兵東市遙為之執其將楊醜殺楊以應太祖楊將眭固
又殺醜將其衆欲北合袁紹太祖遣史渙邀擊破之於
射犬城斬固盡收其衆也

張燕常山真定人也本姓褚黃巾起燕合聚少年為羣
盜在山澤間轉攻還真定衆萬餘人博陵張牛角亦起

衆自號將兵從事與燕合燕推牛角為帥俱攻廩陶牛
角為飛矢所中被創且死令衆奉燕告曰必以燕為帥
牛角死衆奉燕故改姓張燕剽悍捷速過人故軍中號
曰飛燕其後人衆寔廣燕善招攜故常山趙郡中山上
黨河內諸山谷皆相通其小帥孫輕王當等各以部衆
從燕衆至百萬號曰黑山靈帝不能征河北郡縣被其
害燕遣人至京都乞降拜燕平難中郎將是後董卓遷
天子於長安天下兵數起燕遂以其衆與豪傑相結衆

紹與公孫瓚爭冀州燕遣將杜長等助瓚與紹戰為紹所敗人衆稍散太祖將定冀州燕遣使求佐王師拜征北將軍率衆詣鄴封安國亭侯邑五百戶燕薨子方嗣方薨子融嗣燕曾孫林晉惠帝世為門下令史與趙王倫為亂未及期年位至尚書令衛將軍封郡公尋為倫所殺

公孫度字升濟本遼東襄平人也度父延避吏居玄菟任度為郡吏時玄菟太守公孫域子豹年十八早死度

少時名豹又與域子同年域見而親愛之遣就師學為

取妻後舉有道除尚書郎稍遷冀州刺史以謠言免同

郡徐榮為董卓中郎將薦度為遼東太守度起玄菟小

吏為遼東郡所輕先時屬國公孫昭守襄平令召度子

康為伍長度到官收昭笞殺於襄平市郡中名豪大姓

田韶等宿遇無恩皆以法誅所夷滅百餘家郡中震慄

東伐高句驪西擊烏丸威行海外初平元年度知中國

擾攘語所親吏柳毅陽儀等曰漢祚將絕當與諸卿圖

王耳時襄平延里社生大石長丈餘下有二小石為之足或謂度曰此漢宣帝冠石之祥而里名與先君同社主土地明當有土地而三公為輔也度益喜故河內太守李敏郡中知名惡度所為恐為所害乃將家屬入于海度大怒掘其父冢剖棺焚屍誅其宗族分遼東郡為遼西中遼郡署太守越海收東萊諸縣置營州刺史自立為遼東侯平州牧追封父延為建義侯立漢二祖廟承制設壇墀於襄平城南郊祀天地藉田理兵乘鸞輅

九旒旄頭羽騎太祖表度為武威將軍封永寧鄉侯度
曰我王遼東何永寧也藏印綬武庫度死子康嗣位以
永寧鄉侯封弟恭是歲建安九年也十二年太祖征三
郡烏丸屠柳城袁尚等奔遼東康斬送尚首語在武紀
封康襄平侯拜左將軍康死子晃淵等皆小衆立恭為
遼東太守文帝踐阼遣使即拜恭為車騎將軍假節封
平郭侯追贈康大司馬初恭病陰消為閹人劣弱不能
治國太和二年淵脅奪恭位明帝即位拜淵揚烈將軍

遼東太守淵遣使南通孫權往來賂遺權遣使張彌許
晏等齎金玉珍寶立淵為燕王淵亦恐權遠不可恃且
貪貨物誘致其使悉斬送彌晏等首明帝於是拜淵大
司馬封樂浪公持節領軍如故使者至淵設甲兵為軍
陣出見使者又數對國中賓客出惡言景初元年乃遣
幽州刺史毋丘儉等齎璽書徵淵淵遂發兵逆於遼隧
與儉等戰儉等不利而還淵遂自立為燕王置百官有
司遣使者持節假鮮卑單于璽封拜邊民誘呼鮮卑侵

擾北方二年春遣太尉司馬懿征淵六月軍至遼東淵遣將軍卑衍楊祚等步騎數萬屯遼陽圍塹二十餘里懿軍至今衍逆戰懿遣將軍胡遵等擊破之懿令軍穿圍引兵東南向而急東北即趨襄平衍等恐襄平無守夜走還諸軍進至首山淵復遣衍等迎軍殊死戰懿復擊大破之遂進軍造城下為圍塹會霖雨三十餘日遼水暴長運船自遼口徑至城下雨霽起土山脩櫓為發石連弩射城中淵窘急糧盡人相食死者甚多將軍楊

祚等降八月丙寅夜大流星長數十丈從首山東北墜
襄平城東南壬午淵衆潰與其子脩將數百騎突圍東
南走大兵急擊之當流星所墜處斬淵父子城破斬相
國以下首級以千數傳淵首洛陽遼東帶方樂浪玄菟
悉平初淵家數有怪犬冠幘絳衣上屋晨炊有小兒蒸
死甑中襄平北市生肉長圍各數尺有頭目口喙無手
足而動搖占曰有形不成有體無聲其國滅亡始度以
中平六年據遼東至淵三世凡五十年而滅始淵兄晃

為恭任子在洛陽淵首到晁亦坐戮

張繡武威祖厲人驃騎將軍濟族子也邊章韓遂為亂涼州金城麴勝襲殺祖厲長劉雋繡為縣吏間伺殺勝郡內義之遂招合少年為邑中豪桀董卓敗濟與李傕擊呂布為卓報仇語在卓傳繡隨濟以軍功稍遷至建忠將軍封宣威侯濟屯弘農士卒饑餓南攻穰為流矢所中死繡領其衆屯宛與劉表合太祖南征軍涇水繡舉衆歸之太祖納濟妻繡恨之太祖聞其不悅密有殺

繡之計計漏繡掩襲太祖太祖軍敗二子沒繡還保穰
太祖比年攻之不克及太祖拒袁紹於官渡繡從賈詡
計復以衆降語在詡傳繡至太祖執繡手與之歡宴為
子均取繡女拜揚武將軍官渡之役繡力戰有功遷破
羌將軍從破袁紹於南皮復增邑凡二千戶時天下戶
口減耗十才一在諸將之封未有滿千戶者而繡特多
從征烏丸於柳城未至薨諡定侯子泉嗣坐與魏諷謀
反國除

張魯字公祺沛國豐人也祖父陵客蜀學道於鵠鳴山中造作符書以惑百姓從受道者出米五斗故世號米賊陵死子衡行其道衡死魯復行之益州牧劉焉以魯為督義司馬與別部司馬張脩將兵擊漢中太守蘇固魯遂襲殺脩奪其衆焉死子璋代立以魯不順盡殺魯母家室魯遂據漢中以鬼道教民自號師君其來學道者初皆名鬼卒受本道已信號祭酒各領部衆多者為治頭大祭酒皆教以誠信不欺詐有病自首其過大都

與黃巾相似諸祭酒皆作義舍如今之亭傳又置義米肉懸於義舍行路者量腹取足若過多鬼道輒病之犯法者三原然後乃行刑不置長吏皆以祭酒為治民夷便樂之雄據巴漢垂三十年漢末力不能征遂就寵魯為鎮民中郎將領漢寧太守通貢獻而已民有地中得玉印者羣下欲尊魯為漢寧王魯功曹巴西閭圃諫曰漢川之民戶出十萬財富土沃四面險固上匡天子則為桓文次及竇融不失富貴今承制署置勢足斬斷不

煩於王願且不稱勿為禍先魯從之韓遂馬超之亂關

西民從子午谷奔魯者數萬家建安二十年太祖乃自散關出武都征之至陽平關魯欲舉漢中降其弟衛不肯帥衆數萬距關堅守太祖攻破之遂入蜀魯聞陽平已陷將稽顙圍又曰今以迫往功必輕不如依杜灌赴朴胡相拒然後委質功必多於是乃奔南山入巴中左右欲悉燒寶貨倉庫魯曰本欲歸命國家而意未達今之走避銳鋒非有惡意寶貨倉庫國家之有遂封藏而

去太祖入南鄭甚嘉之又以魯本有善意遣人慰喻魯盡將家出太祖逆拜魯為鎮南將軍待以客禮封閬中侯邑萬戶封魯五子及閻圃等皆為列侯為子彭祖取魯女魯薨諡原侯子富嗣

夏侯惇字元讓沛國譙人夏侯嬰之後也年十四就師學人有辱其師者惇殺之由是以烈氣聞太祖初起惇常為裨將從征伐太祖行奮武將軍以惇為司馬別屯白馬遷折衝校尉領東郡太守太祖征陶謙留惇守濮

陽張邈叛迎呂布太祖家在鄆城惇輕車往赴適與布
會交戰布退還遂入濮陽襲得惇軍輜重遣將偽降共
執持惇責以寶貨惇軍中震恐惇將韓浩乃勒兵屯惇
營門召軍吏諸將皆案甲當部不得動諸營乃定遂詣
惇所叱持質者曰汝等凶逆乃敢執劫大將軍復欲望
生邪且吾受命討賊寧能以一將軍之故而縱汝乎因
涕泣謂惇曰當奈國法何促召兵擊持質者持質者惶
懼叩頭言我但欲乞資用去耳浩數責皆斬之惇既免

太祖聞之謂浩曰卿此可為萬世法乃著令自今已後有持質者皆當并擊勿顧質由是劫質者遂絕太祖自徐州還惇從征呂布為流矢所中傷左目時夏侯淵與惇俱為將軍軍中呼惇為盲夏侯惇惡之每照鏡輒撲鏡於地復領陳留濟陰太守加建武將軍封高安鄉侯時旱蝗大作惇乃斷太壽水作陂身自負土率將士勸種稻民賴其利轉領河南尹太祖平河北為大將軍後拒鄴破遷伏波將軍領尹如故使得以便宜從事不拘

科制建安十二年錄惇前後功增封邑千八百戶并前二千五百戶二十一年從征孫權還使惇都督二十六軍留居巢賜伎樂名倡令曰魏絳以和戎之功猶受金石之樂况將軍乎二十四年太祖擊破呂布軍於摩陂召惇常與同載特見親重出入卧内諸將莫得比也拜前將軍督諸軍還壽春徙屯召陵文帝即王位拜大將軍數月薨諡忠侯惇雖在軍旅親迎師受業性清儉有餘財輒以分施不足資之於官不治產業子充嗣帝追

思惇功欲使子孫畢侯分惇邑千戶賜惇七子二孫爵皆關內侯惇弟廉及子楸素自封列侯初太祖以女妻楸即清河公主也楸歷位侍中尚書安西鎮東將軍假節充薨子廙嗣廙薨子劭嗣韓浩者字元嗣河內人漢末兵起縣近山藪多寇浩聚徒衆為縣藩衛太守王匡以為從事將兵拒董卓於盟津時浩舅杜陽為河陰令卓執之使招浩浩不從袁術聞而壯之以為騎都尉夏侯惇聞其名請與相見大奇之使領兵從征伐時大議

損益浩以為當急田太祖善之遷護軍太祖欲討柳城
領軍史渙以為道遠深入非完計也欲與浩共諫浩曰
今兵勢彊盛威加四海戰勝攻取無不如志不以此時
遂除天下之患將為後憂且公神武舉無遺策吾與君
為中軍主不宜沮衆遂從破柳城改其官為中護軍置
長史司馬從討張魯魯降議者以浩智畧足以綏邊欲
留使都督諸軍鎮漢中太祖曰吾安可以無護軍遂與
俱還其見親任如此及薨太祖愍惜之無子以養子榮

嗣史渙字公劉沛國人少任俠有雄氣太祖初起以客
從行中軍校尉從征伐常監諸將見親信轉拜中領軍
十四年薨子靜嗣

夏侯淵字妙才惇族弟也太祖居家曾有縣官事淵代
引重罪太祖營救之得免時充豫大亂淵以饑乏棄其
幼子而活亡弟孤女人以此義之太祖起兵以別部司
馬騎都尉從遷陳留潁川太守及與袁紹戰於官渡行
督軍校尉紹破使督兗豫徐州軍糧時軍食少淵傳饋

相繼軍以復振昌狝反遣于禁擊之未拔復遣淵與禁并力遂擊狝降其十餘屯狝詣禁降淵還拜典軍校尉淵為將赴急疾常出敵之不意故軍中為之語曰典軍校尉夏侯淵三日五百六日一千濟南樂安黃巾徐和司馬俱等攻城殺長吏淵將泰山齊平原郡兵擊大破之斬和平諸縣收其糧穀以給軍士十四年以淵為行領軍太祖征孫權還使淵督諸將擊廬江叛者雷緒緒破又行征西護軍督徐晃擊太原賊攻下二十餘屯斬

賊帥商曜屠其城從征韓遂等戰於渭南又督朱靈平
隃麋汧氏與太祖會安定降楊秋十七年太祖乃還鄴
以淵行護軍將軍督朱靈路招等屯長安擊破南山賊
劉雄降其衆圍遂超餘黨梁興於鄆拔之斬興封博昌
亭侯馬超圍涼州刺史韋康於冀淵救康未到康敗去
冀二百餘里超來逆戰軍不利汧氏反淵引軍還十九
年趙衢尹奉等謀討超姜叙起兵鹵城以應之衢等譎
說超使出擊叙於後盡殺超妻子超奔漢中還圍祁山

叙等急求救諸將議者欲須太祖節度淵曰公在鄴反覆四千里比報回叙等必敗非救急也遂行使張郃督步騎五千在前從陳倉狹道入淵自督糧在後郃至渭水上超將氐羌數千逆郃未戰超走郃進軍收超軍器械淵到諸縣皆已降韓遂在顯親淵欲襲取之遂走淵收遂軍糧追至畧陽城去遂二十餘里諸將欲攻之或言當攻興國氏淵以為遂兵精興國城固攻不可卒拔不如擊長離諸羌長離諸羌多在遂軍必歸救其家若

遂獨守則孤救長離則官兵得與野戰可必虜也淵乃留督將守輜重輕兵步騎到長離攻燒羌屯斬獲甚衆諸羌在遂軍者各還種落遂果救長離與淵軍對陣諸將見遂衆惡之欲結營作塹乃與戰淵曰我轉鬪千里今復作營塹則士衆罷弊不可久賊雖衆易與耳乃鼓之大破遂軍得其旌麾還畧陽進軍圍興國氏王千萬逃奔馬超餘衆降轉擊高平屠各皆散走收其糧穀牛馬乃假淵節初枹罕宋建因涼州亂自號河首平漢王

太祖使淵帥諸將討建淵至圍杞罕月餘拔之斬建及所置丞相已下淵別遣張郃等平河關渡河入小湟中河西諸羌盡降隴右平太祖下令曰宋建造為亂逆三十餘年淵一舉滅之虎步關右所向無前仲尼有言吾與爾不如也二十一年增封三百戶并前八百戶還擊武都氏羌下辯收氐穀十餘萬斛太祖西征張魯淵等將涼州諸將侯王已下與太祖會休亭太祖每引見羌胡以淵畏之會魯降漢中平以淵行都護將軍督張郃

徐晃等平巴郡太祖還鄴留淵守漢中即拜淵征西將
軍二十三年劉備軍陽平關淵率諸將拒之相守連年
二十四年正月備夜燒圍鹿角淵使張郃護東圍自將
輕兵護南圍備挑戰郃軍不利淵分所將兵半助郃為
備所襲淵遂戰死諡曰愍侯初淵雖數戰勝太祖常戒
曰為將當有怯弱時不可但恃勇也將當以勇為本行
之以智計但知任勇一匹夫敵耳淵妻太祖內妹長子
衡尚太祖弟海陽哀侯女恩寵特隆衡襲爵轉封安寧

亭侯黃初中賜淵中子霸太和中賜霸四弟爵皆關內
侯霸正始中為討蜀護軍右將軍進封博昌亭侯素為
曹爽所厚聞爽誅自疑亡入蜀以淵舊勲赦霸徙樂浪
郡霸弟威官至兗州刺史威弟惠樂安太守惠弟和河
南尹和弟稱自孺子時而好合聚童兒為之渠帥戲必
為軍旅戰陣之事有違者輒嚴以鞭箠衆莫敢逆淵竒
之使讀項羽傳及兵書不肯曰能則自為耳安能學人
年十六淵與之畋見奔虎稱馳馬逐之禁之不可一箭

而倒名聞太祖太祖把其手喜曰我得汝矣與文帝為布衣之交每宴會氣陵一坐辯士不能屈世之高名者多從之游年十八卒稱弟榮幼聰慧七歲能屬文誦書日千言經目輒識之文帝聞而請焉賓客百餘人人一奏刺悉書其鄉邑姓名世所謂爵里刺也客示之一寓目使之遍談不謬一人帝深竒之漢中之敗榮年十三左右提之走不肯曰君親在難焉所逃死乃奮劍而戰遂沒陣衡薨子績嗣為虎賁中郎將績薨子褒嗣

夏侯尚字伯仁淵從子也文帝與之親友太祖定冀州尚為軍司馬將騎從征伐後為五官將文學魏國建遷黃門侍郎代郡胡叛遣鄆陵侯彰征討之以尚參彰軍事定代地還太祖崩於洛陽尚持節奉梓宮還鄴并錄前功封平陵亭侯拜散騎常侍遷中領軍文帝踐阼更封平陵鄉侯遷征南將軍領荊州刺史假節都督南方諸軍事尚奏劉備別軍在上庸山道險難彼不我虞若以竒兵潛行出其不意則獨克之勢也遂勒諸軍擊破

上庸平三郡九縣遷征南大將軍孫權雖稱藩尚益脩
攻討之備權後果有貳心黃初三年車駕幸宛使尚率
諸軍與曹真共圍江陵權將諸葛瑾與尚對江瑾渡入
江中渚而分水軍於江中尚夜多持油船將步騎萬餘
人於下流潛渡攻瑾諸軍夾江燒其舟船水陸並攻破
之城未拔會大疫詔勅尚引諸軍還益封六百戶并前
千九百戶假鉞進為牧荊州殘荒外接蠻夷而與吳阻
漢水為境舊民多居江南尚自上庸通道西行七百餘

里山民蠻夷多服從者五六年間降附數千家五年徙封昌陵鄉侯尚有愛妾嬖幸寵奪適室適室曹氏女也故文帝遣人絞殺之尚悲感發病恍惚既葬埋妾不勝思見復出視之文帝聞而恚之曰杜襲之輕薄尚良有以也然以舊臣恩寵不衰六年尚疾篤還京都帝數臨幸執手涕泣尚薨諡曰悼侯子玄嗣又分尚戶三百賜尚弟子奉爵關內侯玄字太初少知名弱冠為散騎黃門侍郎嘗進見與皇后弟毛曾並坐玄耻之不悅形之

於色明帝恨之左遷為羽林監正始初曹爽輔政玄爽之姑子也累遷散騎常侍中護軍玄世名知人為中護軍拔用武官參戟牙門無非俊傑後多牧州典郡立法垂教者太傅司馬懿訪以時事玄上議於懿皆切政理懿敬重焉頃之為征西將軍假節都督雍涼諸軍事玄既遷大將軍司馬師代為護軍護軍總統諸將任主武官選舉前後當此官者不能止貨賂故蔣濟為護軍時有謠言欲求牙門當得千匹百人督五百匹司馬懿與

濟善聞以問濟濟無以解之因戲曰洛中市買一錢不足則不行遂相對歡笑玄代濟雖號識別然亦不能止絕人事及師代玄乃整頓法令無敢犯者玄在州與曹爽共興駱谷之役時人譏之爽誅徵玄為大鴻臚數年徙太常玄以爽抑絀內不得意中書令李豐雖宿為司馬師所親待然私心在玄遂結皇后父光祿大夫張緝謀欲以玄輔政豐既內握權柄子韜復尚齊長公主又與緝俱馮翊人故緝信之豐陰令其弟兖州刺史翼求

入朝欲使將兵入并力起事會翼求朝不聽嘉平六年
二月當拜貴人豐等欲因御臨軒諸門有陞兵誅師以
玄代之以緝為驃騎將軍豐密語黃門監蘇鑠永寧署
令樂敦冗從僕射劉賢等因曰卿諸人居內多有不法
大將軍嚴毅累以為言張當可以為誠鑠等皆許以從
命豐遂遣子韜以謀報玄玄曰宜詳之耳師微聞其謀
使舍人王羨以車迎豐豐不知而往師以所聞責豐豐
知禍及遂正色曰卿父子懷姦將傾社稷惜吾力劣不

能相禽滅耳師怒使勇士以刀環築殺之事下有司收
玄緝鑠敦賢等送廷尉玄至廷尉不肯下辭廷尉鍾毓
自臨治玄玄正色責毓曰吾當何辭卿為令史責人也
卿便為吾作毓以其名士節高不可屈而獄當竟夜為
作辭令與事相附流涕以示玄玄視頷之而已毓弟會
年少於玄玄不與交是日於毓坐欲狎而友玄玄正色
曰鍾君何得相逼如此毓遂奏豐等謀迫脅至尊擅誅
冢宰大逆無道請論如法於是會公卿朝臣廷尉議咸

以毓所正皆如科律報毓施行詔書齊長公主先帝遺
愛原其三子死命於是豐玄緝敦賢等皆夷三族韜以
尚主賜死獄中其餘親屬徙樂浪郡玄格量弘濟臨斬
東市顏色不變舉動自若時年四十六初玄為征西被
徵時夏侯霸將奔蜀呼玄欲與之俱玄曰吾豈苟存自
容於寇虜乎遂還京師太傅司馬懿薨高陽許允謂玄
曰無復憂矣玄歎曰卿何不見事乎此人猶能以通家
年少遇我子玄子上不吾容也元嘗著樂毅張良及本

無肉刑論辭旨通遠咸傳於世玄之執也衛將軍司馬
昭流涕請之師曰卿忘會趙司空葬乎先是司空趙儼
薨師昭兄弟會葬賓客以百數玄時後至衆賓客咸越
席而迎師由是惡之玄之禍蓋萌於此云正元中紹功
臣世封尚從孫本為昌陵亭侯邑三百戶以奉尚後李
豐字安國衛尉義之子也黃初中以父任召隨軍始為
白衣時年十七八在鄴下名為清白識別人物海內翕
然莫不注意後隨軍在許昌聲稱日隆其父不願其然

勅令閉門謝客初明帝在東宮豐在文學中及即尊位得吳降人問江東聞中國名士為誰降人云聞有李安國者是時豐為黃門郎明帝問左右安國所在左右以豐對帝曰豐名乃被於吳越邪後轉騎都尉給事中帝崩後為永寧太僕以名過其實能用少也正始中遷侍中尚書僕射豐在臺省常多託疾時臺制疾滿百日當解祿豐疾未滿數十日輒暫起已復卧如是數歲豐弟翼及偉仕數歲間並歷郡守時太傅司馬懿久病偉為

二千石荒於酒亂新平扶風二郡而豐不召衆人以為
恃寵曹爽專政豐依違二公間無有適莫故于時有謗
書曰曹爽之勢熱如湯太傅父子冷如漿李豐兄弟如
游光其意以為豐雖外示清淨而內圖事有似於游光
也及司馬懿奏誅爽住車闕下與豐相聞豐怖懾氣索
足委地不能起至嘉平四年懿終後中書令缺大將軍
司馬師因奏用豐豐知此非顯選又自以連婚國家思
附至尊深疾司馬氏放逐有廢易之謀及事敗被誅師

夜送豐尸以付廷尉廷尉鍾毓不受曰非法官所治也
以其狀告且勅之乃受帝怒將問豐死意太后懼呼帝
入乃止遂遣使收翼翼後妻散騎常侍荀廙姊謂翼曰
中書事發可及詔書未至赴吳何為坐取死已左右可
共同赴水火者誰翼思未答妻曰君在大州不知可與
同死生者去亦不免翼竟從坐先是中領軍許允與豐
及玄親善時有詐作尺一詔書以玄為大將軍允為太
尉共錄尚書事有何人天未明乘馬以詔版付允門吏

曰有詔因便馳走允即投書燒之不以關呈大將軍後
豐等事覺允亦坐謫死允字士宗世冠族父據仕歷典
農校尉郡守允少與同郡崔贊俱發名於冀州召入軍
明帝時為吏部郎選郡守明帝疑其所用非次召入將
加罪允妻阮氏跣出謂曰明主可以理奪難以情求允
頷之而入帝怒詰之允對曰某郡太守雖限滿文書先
至年限在後日限在前帝前取事視之乃釋遣出望其
衣敗曰清吏也賜之後出為郡守稍遷為侍中尚書中

領軍允聞李豐等被收欲往見大將軍師已出門回遑不定中道還取袴豐等已收訖師聞允前遽怪之曰我自收豐等不知士大夫何為忿忿乎是時朝臣遽者多耳而衆人咸以為意在允也會鎮北將軍劉靜卒朝廷以允代靜為鎮北將軍假節都督河北諸軍事已受節傳出止外舍師與允書曰鎮北雖少事而都典一方念足下震華鼓建朱節歷本州此所謂著繡畫行也允心甚悅與臺中相聞欲易其鼓吹旌旗其兄子素頗聞衆

人說允前見嫌意戒允但當趣去耳安用是為邪允曰
卿俗士不解我以榮國耳故求之既而復謂其妻曰吾
知免矣妻曰禍見於此何免之有允善相印將拜以印
不善使更刻之如此者三允曰印雖始成而已被辱問

送印者果懷之而墜於廁

相印書曰相印法本出陳長文長文以語韋仲將印工揚

利從仲將受法以語許士宗利以法術占吉凶十可中
八九仲將問長文從誰得法長文曰本出漢世有相印
相笏經又有鷹經牛經馬經印工宗養以帝以允當出
法語程中伯是故有十三家相法傳於世

乃詔會羣臣羣臣皆集帝特引允以自近允前為侍中

顧當與帝別涕泣歔歔會訖罷以詔促令去會有司奏
允前擅以厨錢穀乞諸俳及其官屬故遂收送廷尉考
問竟得減死徙樂浪郡卒於道中阮氏賢明而醜允始
見愕然交禮畢無復入意阮遣婢覘之云有客姓桓阮
曰是必桓範將勸使入也既而範果勸之允入須臾便
起阮捉裾留之允顧謂曰婦有四德卿有其幾對曰新
婦所乏唯容士有百行君有其幾允曰皆備阮曰士有
百行以德為首君好色不好德何謂皆備允有慙色知

其非凡遂雅相親重生二子竒猛皆少有令問允既為師所誅門生走入告阮正在機神色不變曰早知爾耳門生欲藏其子阮曰無預諸兒事後移居墓所師遣鍾會觀之謂會曰若其子才藝德能及父當收竒猛知之以語其母母答汝等雖佳才具不多可率胸懷與會語便自無憂不須極哀會止便止不可多少問朝事竒等從之會反命具以狀對卒免其禍竒猛後皆貴顯時又有清河王經者字彥偉亦與允俱稱冀州名士初為江

夏太守大將軍曹爽附絹二十四匹令交市於吳經不發書棄官歸母問歸狀經以實對母以經典兵馬而擅去對送吏杖經五十爽聞不復罪母因謂經曰汝田家子今仕至二千石物太過不祥可以止矣經不能從歷二州刺史司隸校尉甘露中為尚書坐高貴鄉公事被誅事在本紀經臨入獄辭母母顏色不變笑而應曰人誰不死往所以止汝者恐死不得其所也以此并命何恨之有哉經為司隸時辟河內向雄為都官從事及經刑

於東市雄哭之感動一市刑及經母雍州故吏皇甫晏以家財收葬焉允始與同發名同郡崔贊者亦嘗戒允以處世太盛允不能用以至於敗

荀彧字文若潁川潁陰人也祖父淑朗陵令父緄濟南相叔父爽司空緄畏憚宦官乃為彧娶中常侍唐衡女彧以少有才名故得免於譏議南陽何顓名知人見彧而異之曰王佐才也永漢元年舉孝廉拜守宮令董卓之亂求出補吏除允父令遂棄官歸鄉里謂父老曰潁

川四戰之地天下有變常為兵衝宜亟避之鄉人多懷
土不能去會冀州牧同郡韓馥遣騎迎之或乃獨將宗
族行其留者後多為董卓將李傕所殺畧焉或比至冀
州而袁紹已奪馥位紹待或以上賓之禮或弟諶及同
郡辛評郭圖皆為紹所任或度紹終不能成大事時太
祖為奮武將軍在東郡或聞其雄畧初平二年乃去紹
而從太祖太祖大悅曰吾子房也以為奮武司馬時年
二十九明年太祖為鎮東將軍領兗州牧或又為鎮東

司馬興平元年太祖征陶謙或任留事守鄆城會張邈
陳宮以兗州反潛迎呂布布既至諸城皆應之邈乃使
人譎或曰呂將軍來助曹使君擊陶謙宜亟供軍實或
知邈有變即勒兵設備故邈計不行豫州刺史郭貢率
兵數萬到城下求見或或將往東郡太守夏侯惇等止
之曰何知貢不與呂布同謀而欲輕見之今君為一州
之鎮往必危也或曰貢與邈等分非素結今來速者計
未必定及其猶豫宜時說之縱不為用可使中立若先

懷疑嫌彼將怒而成謀不如往也貢既見彘無懼意知

城不可攻遂引而去彘乃使程昱說范東阿使固其守

卒全三城以待太祖焉二年陶謙死太祖欲遂取徐州

還定呂布彘諫曰昔高祖保關中光武據河內皆深根

固本以制天下進足以勝敵退足以堅守故雖有困敗

而終濟大業將軍本以兗州首事故能平定山東此實

天下之要地而將軍之關中河內也若不先定之根本

將何所寄乎宜急分討陳宮使虜不得西顧乘其間而

收熟麥約食畜穀以資一舉則呂布不足破也今舍之而東未見其便多留兵則力不勝敵少留兵則後不足固布乘虛寇暴震動人心縱數城或全其餘非復已有則將軍尚安所歸乎且前討徐州威罰實行其子弟念父兄之恥必人自為守就能破之尚不可保彼若懼而相結共為表裏堅壁清野以待將軍將軍攻之不拔掠之無獲不出一旬則十萬之衆未戰而自困矣夫事固有棄彼取此以權一時之執願將軍慮焉太祖於是大

收熟麥復與布戰布敗走因分定諸縣兗州遂平建安
元年太祖擊破黃巾漢獻帝自河東還洛陽太祖議奉
迎都許衆以山東未定韓暹揚奉負功恣睢未可卒制
或乃勸太祖曰昔晉文公納襄王而諸侯景從漢高祖
東伐為義帝縞素而天下歸心自天子播越將軍首唱
義兵徒以山東擾亂未能遠赴關右雖禦難於外乃心
無不在王室今車駕旋軫東京榛蕪義士有存本之思
兆人懷感舊之哀誠因此時奉主上以從民望大順也

秉至公以服天下大畧也扶弘義以致英俊大德也四方雖有逆節必不能為累明矣韓暹楊奉其敢為害若不時定使豪傑生心後雖慮之無及太祖遂至洛陽奉迎天子都許天子拜太祖大將軍進彧為侍中守尚書令常居中持重太祖雖征伐在外軍國事皆與彧籌焉太祖問彧誰能代卿為我謀者彧薦從子攸及鍾繇郭嘉陳羣杜襲司馬懿戲志才等太祖以彧為知人諸所進達皆稱職唯嚴象為揚州韋康為涼州後敗亡自太

祖之迎天子都許也袁紹內懷不服紹既并河朔天下
畏其彊太祖方東憂呂布南拒張繡而繡敗太祖軍於
宛紹益驕與太祖書其辭悖慢太祖大怒出入動靜變
於常衆皆謂以失利於繡故也鍾繇以問或或曰公之
聰明必不追咎往事殆有他慮即見太祖問之太祖以
紹書示或曰今將討不義而力不敵何如或曰古之成
敗者誠有其才雖弱必彊苟非其人雖彊易弱劉項之
存亡足以觀矣今與公爭天下者唯袁紹爾紹貌外寬

內忌任人而疑其心公明達不拘唯才所宜此度勝也
紹遲重少決失在後機公能斷大事應變無方此謀勝
也紹御軍寬緩法令不立士卒雖衆其實難用公法令
既明賞罰必行士卒雖寡皆爭致死此武勝也紹憑世
資從容飾智以收名譽故士之寡能好問者多歸之公
以至仁待人推誠心不為虛美行已謹儉而與有功者
無所吝惜故天下忠正效實之士咸願為用此德勝也
夫以四勝輔天子仗義征伐誰敢不從紹雖彊其何能

為太祖悅或曰不先取呂布河北亦未易圖也太祖曰
然吾所惑者又恐紹侵擾關中亂羌胡南誘蜀漢是我
獨以充豫抗天下六分之五也為將奈何或曰關中將
帥以十數莫能相一唯韓遂馬超最彊彼見山東方爭
必各擁衆自保今若撫以恩德遣使連和相持雖不能
久安比公安定山東足以不動鍾繇可屬以西事則公
無憂矣三年太祖既破張繡東禽呂布定徐州遂與袁
紹相拒孔融謂或曰紹地廣兵彊田豐許攸智計之士

也為之謀審配逢紀盡忠之臣也任其事顏良文醜勇

冠三軍統其兵殆難克乎或曰紹兵雖多而法不整田
豐剛而犯上許攸貪而不治審配專而無謀逢紀果而
自用此二人留知後事若攸家犯其法必不能縱也不
縱攸必為變顏良文醜一夫之勇耳可一戰而禽也五
年與紹連戰太祖保官渡紹圍之太祖軍糧方盡書與
或議欲還許以致紹師或報曰今軍食雖少未若楚漢
在滎陽成臯間也是時劉項莫肯先退先退者執屈也

公以十分居一之衆畫地而守之扼其喉而不得進已
半年矣情見勢竭必將有變此用奇之時不可失也太
祖乃止遂以奇兵襲紹別屯斬其將淳于瓊等紹退走
審配以許攸家不法收其妻子攸怒叛紹顏良文醜臨
陣授首田豐以諫見誅皆如或所策六年太祖就穀東
平之安民糧少不足與河北相支欲因紹新破以其間
擊討劉表或曰今紹敗其衆離心宜乘其困遂定之而
背兗豫遠師江漢若紹收其餘燼承虛以出人後則公

事去矣太祖復次于河上紹病死太祖渡河擊紹子譚尚而高幹郭援侵畧河東關右震動鍾繇帥馬騰等擊破之語在繇傳八年太祖錄前後功表封或為萬歲亭侯九年太祖拔鄴領冀州牧有說太祖宜復古置九州則冀部所制者廣大天下易服太祖將從之或言曰今若依古制是為冀州所統悉有河東馮翊扶風西河幽并之地也公前屠鄴城海內震駭各懼不得保其土宇守其兵衆今若一處被侵必謂以次見奪人心易動若

一旦生變天下未可圖也願公先定河北然後修復舊京南臨楚郢責王貢之不入天下咸知公意則人人自安須海內大定乃議古制此社稷之長利也太祖遂寢九州議是時荀攸常為謀主彧兄衍以監軍校尉守鄴都督河北事太祖之征袁尚也高幹密遣兵謀襲鄴衍逆覺盡誅之以功封列侯太祖以女妻彧長子惲後稱安陽公主彧及攸並貴重皆謙冲節儉祿賜散之宗族知舊家無餘財十二年增彧邑千戶合二千戶太祖將

伐劉表問彧策安出彧曰今華夏已平南土知困矣可
顯出宛葉而間行輕進以掩其不意太祖遂行會表病
死太祖直趨宛葉如彧計表子琮以州逆降十七年董
昭等謂太祖宜進爵國公九錫備物以彰殊勲密以諮
彧彧以為太祖本興義兵以匡朝寧國秉忠貞之誠守
退讓之實君子愛人以德不宜如此太祖由是心不能
平會征孫權表請彧勞軍于譙因輒留彧以侍中光祿
大夫持節參丞相軍事太祖軍至濡須彧疾留壽春太

祖饋之食發視乃空器也於是或飲藥而卒年五十漢

帝哀惜之祖日為之廢讌樂諡曰敬侯明年太祖遂稱

魏公云子惲嗣官至虎賁中郎將初文帝與平原侯植

並有擬論文帝曲禮事或及或卒惲又與植善而與夏

侯尚不睦文帝深恨惲惲早卒子翽音翼以外甥故猶

寵待惲弟侯御史中丞侯弟詵大將軍從事中郎皆知

名早卒詵弟顓咸熙中為司空惲子翽嗣為散騎常侍

進爵廣陽鄉侯年三十薨子顓嗣冀官至中領軍薨諡

貞侯追贈驃騎將軍子愷嗣寔妻司馬師之妹也師昭
皆與親善咸熙中開建五等寔以著勲前朝改封愷南
頓子

荀攸字公達或從子也祖父曇廣陵太守攸少孤年七
八歲叔父衢嘗醉誤傷攸耳而攸出入遊戲常避護不
欲令衢見衢後聞之乃驚其夙智如此及曇卒故吏張
權求守曇墓攸年十三疑之謂衢曰此吏有非常之色
殆將有姦衢寤乃推問果殺人亡命由是異之何進秉

政徵海內名士攸等二十餘人攸到拜黃門侍郎董卓之亂關東兵起卓徙都長安攸與議郎鄭泰何顥侍中种輯越騎校尉伍瓊等謀曰董卓無道甚於桀紂天下皆怨之雖資彊兵實一匹夫耳今直刺殺之以謝百姓然後據殺函輔王命以號令天下此桓公之舉也事垂就而覺收顥攸繫獄顥憂懼自殺攸言語飲食自若會卓死得免棄官歸復辟公府舉高第遷任城相不行攸以蜀漢險固人民殷盛乃求為蜀郡太守道絕不得至

駐荊州太祖迎天子都許遺攸書曰方今天下大亂智士勞心之時也而顧觀變蜀漢不巳久乎於是徵攸為汝南太守入為尚書太祖素聞其名與語大悅謂荀彧鍾繇曰公達非常人也吾得與之計事天下當何憂哉以為軍師建安三年從征張繡攸言於太祖曰繡於劉表相恃為彊然繡以游軍仰食於表表不能供也勢必離不如緩軍以待之可誘而致也若急之其勢必相救太祖不從遂進軍之穰與戰繡急表果救之軍不利太

祖謂攸曰不用君言至是乃設竒兵復戰大破之是歲
太祖自宛征呂布至下邳布敗退固守攻之不拔連戰
士卒疲太祖欲還攸與郭嘉說曰呂布勇而無謀今三
戰皆北其銳氣衰矣三軍以將為主主衰則軍無奮意
夫陳宮有智而遲今及布氣之未復宮謀之未定急攻
之布可拔也乃引沂泗灌城城潰生禽布後從救劉延
於白馬攸畫策斬顏良語在武紀太祖拔白馬還遣輜
重循河而西袁紹渡河追卒與太祖遇諸將皆恐說太

祖還保營攸曰此所以禽敵奈何去之太祖目攸而笑
遂以輜重餌賊賊競奔之陣亂乃縱步騎擊大破之斬
其將文醜太祖遂與紹相拒於官渡軍食方盡攸言於
太祖曰紹運車旦暮至其將韓莫銳而輕敵擊可破也
太祖曰誰可使攸曰徐晃可乃遣晃及史渙邀擊破走
之燒其輜重會許攸來降言紹遣淳于瓊等將萬餘兵
迎運糧將驕卒惰可邀擊也衆皆疑唯攸與賈詡勸太
祖太祖乃留攸及曹洪守軍太祖自將攻破之盡斬瓊

等紹將張郃高覽燒攻櫓降紹遂棄軍走郃之來洪疑不敢受攸謂洪曰郃計不用怒而來君何疑乃受之七年從討袁譚尚於黎陽明年太祖方征劉表譚尚爭冀州譚遣辛毗乞降請救太祖將許之以問羣下羣下多以為表彊宜先平之譚尚不足憂也攸曰天下方有事而劉表坐保江漢之間其無四方之志可知矣袁氏據四州之地帶甲十萬紹以寬厚得衆借使二子和睦以守其成業則天下之難未息也今兄弟構惡其勢不兩

全若有所并則力專力專則難圖也及其亂而取之天下定矣此時不可失也太祖曰善乃許譚和親遂還擊破尚其後譚叛從斬譚於南皮冀州平太祖表封攸陵樹亭侯十二年大論功行封太祖曰忠正密謀撫寧內外文若是也公達其次也增邑四百戶並前七百戶轉為中軍師魏國初建為尚書令攸深密有智防自從太祖征伐常謀蒼帷幄時人及子弟莫知其所言太祖每稱曰公達外愚內智外怯內彊不伐善無施勞智可及

愚不可及雖顏子甯武不能過也文帝在東宮太祖謂曰荀公達人之師表也汝當盡禮敬之攸曾病世子問病獨拜牀下其見尊異如此攸與鍾繇善繇言我每有所行反覆思惟自謂無以易以咨公達輒復過人意公達前後凡畫竒策十二唯繇知之繇撰集未就會薨故世不得盡聞也攸後從征孫權道薨時年五十八太祖言則流涕每曰孤與荀公達周遊二十餘年初無毫毛可非者又常稱荀令君之進善不進不休荀軍師之去

惡不去不止君子以為知言長子緝有攸風早卒次子適嗣無子絕黃初中紹封攸孫彪為陵樹亭侯邑三百戶後轉封丘陽亭侯正始中追謚攸曰敬侯

賈詡字文和武威姑臧人也少時人莫之知惟漢陽閻忠異之謂詡有良平之竒察孝廉為郎疾病去官西還至汧遇叛氐同行數十人皆為所執詡曰我段公外孫也汝別埋我我家必厚贖之時太尉段熲久為邊將威震西土故詡以懼氐氐果不敢害與盟而送之其餘悉

死詡實非段甥權以濟事咸此類也董卓之入洛陽詡以太尉掾為平津都尉遷討虜校尉卓壻中郎將牛輔屯陝詡在輔軍卓敗輔又死衆恐懼校尉李傕郭汜張濟等欲解散間行歸鄉里詡說之使攻長安語在卓傳傕等既得志以詡為左馮翊欲以功侯之詡曰此救命之計何功之有固辭不受又以為尚書僕射詡曰尚書僕射官之師長天下所望詡名不素重非所以服人也縱詡昧於榮利奈國朝何乃更拜詡尚書典選舉多選

舊名以為令僕論者以此多詡而於催等復多所匡濟
故皆親而憚之會母喪去官拜光祿大夫催汜等鬪長
安中催復請詡為宣義將軍催等和出天子祐護大臣
詡有力焉天子既出詡上還印綬是時將軍段熲屯華
陰與詡同郡遂去催託熲詡素知名為熲軍所望熲內
恐其見奪而外奉詡禮甚備詡愈不自安張繡在南陽
詡陰結繡繡遣人迎詡詡將行或謂詡曰熲待君厚矣
君安去之詡曰熲性多疑有忌詡意禮雖厚不可恃久

將為所圖我去必喜又望吾結大援於外必厚吾妻子
繡無謀主亦願得詗則家與身必俱全矣詗遂往繡執
子孫禮煨果善視其家詗說繡與劉表連和太祖比征
之一朝引軍退繡自追之詗謂繡曰不可追也追必敗
繡不從進兵交戰大敗而還詗謂繡曰促更追之更戰
必勝繡謝曰不用公言以至於此今已敗奈何復追詗
曰兵勢有變速往必利繡從之遂收散卒赴追大戰果
以勝還問詗曰繡以精兵追退軍而公曰必敗退以敗

卒擊勝兵而公曰必克悉如公言何其反而皆驗也詡
曰此易知耳將軍雖善用兵非曹公敵也軍雖新退曹
公必自斷後追兵雖精將既不敵彼士亦銳故知必敗
曹公攻將軍無失策力未盡而退必國內有故已破將
軍必輕車速還縱留諸將斷後諸將雖勇亦非將軍敵
故雖用敗兵而戰必勝也繡乃服是後太祖拒袁紹於
官渡紹遣人招繡并與詡書結援繡欲許之詡顯於繡
坐上謂紹使曰歸謝袁本初兄弟不能相容而能容天

下國士乎繡驚懼曰何至於此竊謂詡曰若此當何歸
詡曰不如從曹公繡曰袁彊曹弱又與曹為讎從之若
何詡曰此所以宜從也夫曹公奉天子以令天下其宜
從一也紹彊盛我以少衆從之必不以我為重曹公衆
弱其得我必喜其宜從二也夫有霸王之志者固將釋
私怨以明德於四海其宜從三也願將軍無疑繡從之
率衆歸太祖太祖見之喜執詡手曰使我信重於天下
者子也表詡為執金吾封都亭侯遷冀州牧冀州未平

留參司空軍事袁紹圍太祖於官渡太祖糧盡問詡計
焉出詡曰公明勝紹勇勝紹用人勝紹決機勝紹有此
四勝而半年不定者但顧萬全故也必決其機須臾可
定也太祖曰善乃并兵出圍擊紹三十餘里營破之紹
軍大潰河北平太祖領冀州牧徙詡為太中大夫建安
十三年太祖破荊州欲順江東下詡曰明公昔破袁氏
今收漢南威名遠著軍勢既大若乘舊楚之饒以饗吏
士撫安百姓使安土樂業則可不勞衆而江東稽服矣

太祖不從軍遂無利太祖後與韓遂馬超戰於渭南超等索割地以和并求任子詡以為可偽許之又問詡計策詡曰離之而已太祖曰解一承用詡謀語在武紀卒破遂超詡本謀也是時文帝為五官將而臨菑侯植才名方盛各有黨與有奪宗之議文帝使人問詡自固之術詡曰願將軍恢崇德度躬素士之業朝夕孜孜不違子道如此而已文帝從之深自砥礪太祖又嘗屏除左右問詡詡嘿然不對太祖曰與卿言而不答何也詡曰

屬適有所思故不即對耳太祖曰何思詡曰思袁本初
劉景升父子也太祖大笑於是太子遂定詡自以非太
祖舊臣而策謀深長懼見猜嫌闔門自守退無私交男
女嫁娶不結高門天下之論智計者歸之文帝即位以
詡為太尉進爵魏壽鄉侯增邑三百并前八百戶又分
邑三百封小子訪為列侯以長子穆為駙馬都尉帝問
詡曰吾欲伐不從命以一天下吳蜀何先對曰攻取者
先兵權建本者尚德化陛下應期受禪撫臨率土若綏

之以文德而俟其變則平之不難矣吳蜀雖蕞爾小國
依阻山水劉備有雄才諸葛亮善治國孫權識虛實陸

遜見兵勢據險守要汎舟江湖皆難卒謀也用兵之道

先勝後戰量敵論將故舉無遺策臣竊料羣臣無與權

備對雖以天威臨之未見萬全之勢也昔舜舞干戚而

有苗服臣以為當今宜先文後武文帝不納後興江陵

之役士卒多死詗年七十七薨謚肅侯

晉司徒缺武帝問其人於荀勗

勗答曰三公具瞻所歸不可用非其人

昔魏文帝用賈詡為三公孫權笑之
子穆嗣歷位郡

守穆薨子模嗣模子允允弟龕從弟足皆至大官顯於
晉世

袁渙字曜卿陳郡扶樂人也父滂為漢司徒當時諸公
子多越法度而渙清靜舉動必以禮郡命為功曹郡中
姦吏皆自引去後辟公府舉高第遷侍御史除譙令不
就劉備之為豫州舉渙茂才後避地江淮為袁術所命
術每有所咨訪渙常正議術不能抗然敬之不敢不禮
也項之呂布擊術於阜陵渙往從之遂復為布所拘留

布初與劉備和親後離隙布欲使渙作書詈辱備渙不
可再三彊之不許布大怒以兵脅渙曰為之則生不為
則死渙顏色不變笑而應之曰渙聞唯德可以辱人不
聞以罵使彼固君子邪且不耻將軍之言彼誠小人邪
將復將軍之意則辱在此不在彼且渙他日之事劉將
軍猶今日之事將軍也如一旦去此復罵將軍可乎布
慙而止及布敗歸太祖時陳羣父子亦在布軍見太祖
皆拜渙獨高揖不為禮太祖甚嚴憚之時太祖給衆官

車各數乘使取布軍中物唯其所欲衆人皆重載唯渙
取書數百卷資糧而已衆人聞之大慙太祖益以此重
之渙言於太祖曰夫兵者凶器也不得已而用之鼓之
以道德征之以仁義兼撫其民而除其害夫然故可與
之死而可與之生自大亂以來十數年矣民之欲安甚
於倒懸然而暴亂未息者何也意者政失其道歟渙聞
明君善於救世故世亂則齊之以義時偽則鎮之以樸
世異事變治國不同不可不察也夫制度損益此古今

之不必同者也若夫兼愛天下而反之於正雖以武平
亂而濟之以德誠百王不易之道也公明哲超世古之
所以得其民者公既勤之矣今之所以失其民者公既
戒之矣海內賴公得免於危亡之禍然而民未知義唯
公所以訓之則天下幸甚太祖深納焉拜為沛南部都
尉是時新募民開屯田民不樂多逃亡渙白太祖曰夫
民安土重遷不可卒變易以順行難以逆動宜順其意
樂之者乃取不欲者勿彊太祖從之百姓大悅遷為梁

相渙每勅諸縣務存鰥寡高年表異孝子貞婦常談曰
世治則禮詳世亂則禮簡全在斟酌之間耳方今雖擾
攘難以禮化然在吾所以為之為政宗教訓忠恕再思
而後行外溫柔而內能斷以病去官百姓思之後徵為
諫議大夫丞相軍祭酒前後得賜甚多皆散盡之家無
所儲終不問產業乏則取之於人不為皁察之行然時
人服其清魏國初建為郎中令行御史大夫事渙言於
太祖曰今天下大難已除文武並用長久之道也以為

可大收編籍明先聖之教以易民視聽使海內斐然向風則遠人不服可以文德來之太祖善其言時有傳劉備死者羣臣皆賀渙以嘗為備舉吏獨不賀居官數年卒太祖為之流涕賜穀二千斛一教以太倉穀千斛賜郎中令家一教以垣下穀千斛與曜卿家外不解其意教曰以太倉穀者官法也垣下穀者親舊也文帝聞渙昔距呂布之事問渙從弟敏渙勇怯何如敏對曰渙貌似和柔然其臨大節處危難雖賁育不過也渙子侃亦

精粹閑素有父風歷位郡守尚書初渙從弟霸公恪有
功幹魏初為大司農及同郡何夔並知名於世而霸子
亮夔子曾與侃復齊聲友善亮貞固有學行疾何晏鄧
颺等著論以譏切之位至河南尹尚書霸弟徽以儒素
稱遭天下亂避地交州司徒辟不至徽弟敏有武藝而
好水功官至河堤謁者

張範字公儀河內脩武人也祖父歆為漢司徒父延為
太尉太傅袁隗欲以女妻範範辭不受性恬靜樂道忽

於榮利徵命無所就弟承字公先亦知名以方正徵拜
議郎遷伊闕都尉董卓作亂承欲合徒衆與天下共誅
卓承弟昭時為議郎適從長安來謂承曰今誅卓衆寡
不敵難以成功不若擇所歸附待時而動然後可以如
志承然之乃解印綬間行歸家與範避地揚州袁術備
禮招請範稱疾不往術不彊屈也遣承與相見術時欲
僭據即以問承承以正議抗之語在術傳是時太祖將
征冀州術復問曰今曹公欲以弊兵數千敵十萬之衆

可謂不量力矣子以為何如承乃曰漢德雖衰天命未改曹公挾天子以令天下雖敵百萬之衆可也術作色不懌承去之太祖平冀州遣使迎範範以疾留彭城遣承詣太祖太祖表以為諫議大夫範子陵及承子戡為山東賊所得範直詣賊請二子賊以陵還範範謝曰諸君相還兒厚矣夫人情雖愛其子然吾憐戡之小請以陵易之賊義其言悉以還範太祖自荊州還範得見於陳以為議郎參丞相軍事甚見敬重太祖征伐常令範

及邴原留與世子居守太祖謂文帝曰舉動必諮此二人世子執子孫禮範救恤窮乏家無所餘中外孤寡皆歸焉贈遺無所逆亦終不用及去皆以還之建安十七年卒魏國初建承以丞相參軍祭酒領趙郡太守政化大行太祖將西征徵承參軍事至長安病卒文帝即位以範子參為郎中承孫邵晉中護軍與舅楊駿俱被誅事見晉史

涼茂字伯方山陽昌邑人也少好學論議常據經典以

處是非太祖辟為司空掾舉高第補侍御史時泰山多盜賊以茂為泰山太守旬月之間襁負而至者千餘家轉為樂浪太守公孫度在遼東擅留茂不遣之官然茂終不為屈度謂茂及諸將曰聞曹公遠征鄴無守備今吾欲以步卒三萬騎萬匹直指鄴誰能禦之諸將皆曰然又顧謂茂曰於君意何如茂答曰比者海內大亂社稷將傾將軍擁十萬之衆安坐而觀成敗夫為人臣者固若是邪曹公憂國家之危敗愍百姓之苦毒率義兵

為天下誅殘賊功高而德廣可謂無二矣以海內初定
民始安集故未責將軍之罪耳而將軍乃欲稱兵西向
則存亡之效不崇朝而決將軍其勉之諸將聞茂言皆
震動良久度曰涼君言是也後徵還為魏郡太守甘陵
相所在有治績文帝為五官將茂以選為長史遷左軍
師魏國初建遷尚書僕射後為中尉奉常文帝在東宮
茂復為太子太傅甚見敬禮卒官

國淵字子尼樂安蓋人也師事鄭玄後與邴原管寧等

避亂遼東淵篤學好古在遼東常講學於山巖東土多
推慕之由此知名及還舊土太祖辟為司空掾屬每於
公朝論議常直言正色退無私焉太祖欲廣置屯田使
淵典其事淵屢陳損益相土處民計民置吏明功課之
法五年中倉廩豐實百姓競勸樂業太祖征關中以淵
為居府長史統留事田銀蘇伯反河東銀等既破後有
餘黨皆應伏法淵以為非首惡請不行刑太祖從之賴
淵得生者千餘人舊破賊文書以一為十及淵上首級

如其實數太祖問其故淵曰夫征討外寇多其斬獲之數者欲以大武功且示民聽也河間在封域之內銀等叛逆雖克捷有功淵竊恥之太祖大悅遷魏郡太守時有投書誹謗者太祖疾之欲必知其主淵請留其本書而不宣露其書多引二京賦淵勅功曹曰此郡既大今在都輦而少學問者其簡開解年少欲遣就師功曹差三人臨遣引見訓以所學未及二京賦博物之書也世人忽畧少有其師可求能讀者從受之又密喻旨旬日

得能讀者遂往受業吏因請使作牋北方其書與投書人同手收攝案問具得情理遷太僕居列卿位布衣蔬食祿賜散之宗族故舊卒官

王脩字叔治北海營陵人也年七歲喪母母以社日亡來歲鄰里社脩感念母哀甚鄰里為之罷社年二十游學南陽止張奉舍奉舉家得疾病無相視者脩親隱卹之病愈乃去初平中北海相孔融召以為主簿守高密令高密孫氏素豪俠人客數犯法民有相劫者賊入孫

氏吏不能執脩將吏民圍之孫氏拒守吏民畏憚不敢
近脩令吏民敢有不攻者與同罪孫氏懼乃出賊由是
豪彊懾服舉孝廉脩讓郟原融不聽時天下亂遂不行
頃之郡中有反者脩聞融有難夜往奔融賊初發融謂
左右曰能冒難來唯王脩耳言終而脩至復署功曹時
膠東多賊寇復令脩守膠東令膠東人公沙盧宗彊自
為營塹不肯應發調脩獨將數騎徑入其門斬盧兄弟
公沙氏驚怖莫敢動脩撫慰其餘由是寇少止融每有


難脩雖休歸在家無不至融常賴脩以免袁譚在青州
辟脩為治中從事別駕劉獻數毀脩後獻以事當死脩
理之得免時人益以此多焉袁紹又辟脩除即墨令後
復為譚別駕紹死譚尚有隙尚攻譚譚軍敗脩率吏民
往救譚譚喜曰成吾軍者王別駕也譚之敗劉詢起兵
漂陰諸城皆應譚歎息曰今舉州皆叛豈孤之不德邪
脩曰東萊太守管統雖在海表此人不反必來後十餘
日統果棄其妻子來赴譚妻子為賊所殺譚更以統為

樂安太守譚欲復攻尚脩諫曰兄弟還相攻擊是敗亡之道也譚不悅然知其忠節後又問脩計安出脩以手足為譬力勸譚與尚親睦語在譚傳譚不用其言遂與尚相攻請救於太祖太祖既破冀州譚又叛太祖遂引軍攻譚於南皮脩時運糧在樂安聞譚急將所領兵及諸從事數十人往赴譚至高密聞譚已死下馬號哭曰無君焉歸遂詣太祖乞收葬譚屍太祖欲觀脩意默然不應脩復曰受袁氏厚恩若得收斂譚屍然後就戮無

所恨太祖嘉其義聽之以脩為督軍糧還樂安譚之破
諸城皆服唯管統以樂安不從命太祖命脩取統首脩
以統亡國之忠臣因解其縛使詣太祖太祖悅而赦之
袁氏政寬在職勢者多畜聚太祖破鄴沒入審配等家
貲以萬數及破南皮閔脩家穀不滿十斛有書數百卷
太祖歎曰士不妄有名乃禮辟為司空掾行司金中郎
將遷魏郡太守為治抑彊扶弱百姓稱之魏國建為大
司農郎中令太祖議行肉刑脩以為時未可行太祖採

其議乃止徙為奉常其後嚴才反與其徒屬數十人攻掖門脩聞變召車馬未至便將官屬步至宮門太祖在銅爵臺望見之曰彼來者必王叔治也相國鍾繇謂脩曰舊京城有變九卿各居其府脩曰食其祿焉避其難府雖舊非赴難之義頃之病卒官子忠官至東萊太守散騎常侍初脩識高柔於弱冠異王基於童幼終皆遠至世稱其知人

通志卷一百十四



總校官庶吉士臣侍朝

校對官庶吉士臣嚴福

騰錄監生臣徐大豐